

東  
華  
續  
錄

臣王先謙敬編

臣陶澐宣恭校

冬十月壬申朔享太廟○諭軍機大臣等前經疊降諭旨令琦善等合力攻擊迅圖克復揚城乃每逾旬日僅以一奏塞責自雙來失事以後攻城之舉徒託空言揚州一城關繫江北大局若能及早克復則瓜州京口攻剿皆易得手且移此得勝重兵剪除皖省餘匪勢如破竹朕睠懷南顧寢饋難安該大臣係江北總統陳金綬雷以誠等皆係特派幫辦慧成福濟統兵合剿均應協力同心迅圖克復琦善乃屢次獲罪棄瑕錄用之人更當如何感奮圖報朕疊次批示於責備之中仍有成全之意若竟不知愧勵坐擁重兵虛糜帑餉朕惟有執法從事不必諄諄訓諭矣嚴臺當已築

就該大臣等卽併力進攻毋再延誤致干重罪將此由六百里加緊諭令知之○諭朕聞揚州賊匪日漸窮蹙屢次縋城冀圖逃竄自雙來失事以後未聞有攻城之舉而安慶又被賊踞江西匪船分擾楚皖江北一帶若不趕緊肅清賊勢蔓延何所底止朕思移緩就急必以先克揚城爲要著向榮於和春蘇布通阿二員內酌量揀派一員管帶精兵馳往江北與琦善大兵協力攻剿當可破其壁壘迅圖收復至和春見在防堵鎮江該郡爲蘇常屏蔽亦關緊要若派和春赴揚則鎮江要地必當另派得力鎮將以資防剿不可稍存大意至揚州旣復鎮江賊勢自孤當不難次第克復其金陵巢窟見僅防其陸路其水路賊船紛布前令湖北改造戰船順流助剿今湖北賊船欲撲武昌已奏明無暇製造著向榮先行設法將下游已到紅單各船並原備艇船酌量緩急調撥應用許

乃剗帶兵赴上海剿匪若能迅速肅事即可乘勝圖復鎮江與向榮合力籌辦也將此由六百里加緊諭令知之○諭前因西凌阿善祿於河南山西剿賊出力加恩派令幫辦軍務冀與勝保同心合力迅速奏功是三人共辦一事猶如一人朕所倚賴方欲懸擬重賞以待功成乃賊氛日近而該都統將軍經勝保催令前進扼匪北竄轉落勝保之後若謂途中阻滯何以勝保又能跟追向前天津情形急迫雖勝保趕到與文謙等防守兵勇先行攻擊而運河東西兩岸路徑分歧若非分路兜截何以盡殲醜類天津距京師甚近該大臣等何人奮勇迅速何人遲緩貽誤斷難掩朕耳目罰罪賞功皆由自取此旨著勝保閱後卽傳示西凌阿善祿懍遵迅速合力兜剿朕將拭目以俟捷音之至也再運河見泊黔運鉛船必須保護或起運收藏著該大臣卽飭地方文武趕緊妥辦逆

匪奔突剽疾其火藥鉛丸糧米均須設法斷其接濟將此由六百里加緊各諭令知之○贈直隸交河縣殉節知縣孔慶銓知府子祭葬世職建祠○癸酉諭軍機大臣等前有旨將臧紆青以通判畱於安徽補用並諭知奕經仍令該員帶領練勇與張清元武全等剿捕土匪兼遏南來賊匪紛竄之路並非去其團練專歸地方差遣也該員帶領本籍練勇協剿既屬得力若但責以一官一邑轉恐不足以盡其長著奕經呂賢基劉裕鈐察看地方情形何處緊要飭令該員帶勇剿捕如能倍加奮勉著有勞績卽著隨時保奏朕必破格擢用將此由六百里各諭令知之○諭僧格林沁奏見已馳抵東安擬卽移營楊村並布置情形楊村地方爲由津北上水陸要衝該大臣駐紮該處正可迎頭截擊本日據文謙等奏賊匪被剿奔回梁王莊一帶地方等語賊情朝夕變幻靡常一切

布置難以豫度該大臣總須時時偵探必應盡知賊之真情並與勝保文謙等隨時知照何路緊要卽向何路堵截機宜相關閒不容髮桂良未便遽離保定慶祺松玉奕紀竝多爾濟那木凱達洪阿等所帶各兵應由何路扼要截剿均著該大臣飛催前進妥速布置無稍延誤天津至京水旱各路及鈔近道路可詳細具圖奏來文謙等摺著鈔給閱看將此由六百里加緊諭令知之○以盛

桂爲內閣學士

由察哈爾副都統遷

○甲戌諭內閣本年豐工漫口疊次諭

令該督撫等籌備銀米撫恤災民其被賊之湖南湖北江西安徽江蘇河南等處亦經諭令各督撫查明蠲緩乃逆匪由懷慶竄入山西復擾及直隸近畿一帶所過州縣均被蹂躪今秋雨水較多永定河決口地方復被水災赤子何辜遭此塗炭朕廬懷民瘼寢食難安本年秋賦錢糧若照常徵收民力不無拮据著各該督撫

即將被水被賊地方應徵本年下忙錢糧分別應蠲應緩迅速具奏江南山東被災饑民應如何賑恤之處著楊以增崇恩安速籌辦其各省被災被賊地方業經諭令各督撫將來春應否接濟查明具奏如有應行蠲緩之處仍遵前旨迅即查辦奏請恩施並將此旨刊刻宣示咸使聞知○諭軍機大臣等前因江西賊匪竄擾湖北逼近武昌省垣當經諭令駱秉章曾國藩派撥兵勇船礮駛赴下游會剿諒已遵照籌辦矣見在台湧所帶官兵及咨調江西官兵未知何日趕到武昌兵單實恐不敷剿捕曾國藩團練鄉勇甚爲得力勦平土匪業經著有成效著即酌帶練勇馳赴湖北合力圍攻以助兵力之不足所需軍餉著駱秉章籌撥供支兩湖唇齒相依該撫等自應不分畛域一體統籌也將此由六百里諭令知之○向榮奏查東西梁山在金陵上游百四十里大江之濱兩

山對時據險扼守誠難飛越惟逆賊陸路慣於包鈔必東西梁山得兵三四千名方可紮定陸營水面慣於圍繞必大小船得二三百隻方能紮定水寨再以木簕豎塚於江心鐵索橫鎖於江岸庶可遏其衝流斷其接濟此時湖北改造礮船猝難辦就鎮江廣局各艇亦未上駛而大營兵力屢分之後止有此數又難再行分撥止得飛調總兵音德布帶江西折回兵二千名繞道前赴距梁山二十餘里之蕪湖河口駐紮可以捍衛灣汴及運漕等處米糧兼可杜塞東壩小河屏蔽蘇浙俟到有戰船重兵再扼守梁山或扼守兔兒磯或直扼守夾江浦口與大營聯絡庶可乘隙環攻此遠守不如近堵之爲妥也至於五龍山沙洲墟兩礮臺界在金陵鎮江之間象山北固山兩礮臺在鎮城迤北必攻奪鎮城庶象山北固山可以同時竝破卽五龍山沙洲墟等處亦可不攻自下乘此

陸軍水軍直偏觀音儀鳳等門與大營犄角會殲渠魁此分攻不如合剿之爲妥也近查鎮城逆賊多赴金陵卽萬餘斤大礮亦搬運金陵城上鎮城賊勢漸形窘蹙已催令署提臣和春管帶師艇各鎮將水陸夾攻速拔鎮城臣查下關卽浦口之對岸儀鳳門外北岸之夾江口是也上爲雙牖洲下爲七里洲距城約六七里兩洲遙接其勢相聯臣早擬得師船數十隻精銳數千人結水陸營於雙牖七里兩洲之岸作爲兩翼以遏賊衝惟下關距營六十餘里非從太平神策各門賊營越過不能直達其閒至水西旱西門外亦屬進攻之路臣屢次督兵攻打雨花臺賊營卽爲繞西面結營之意無非欲據天塹長江扼賊咽喉無如數月以來兵勇日分而日單鎮將日調而日少以致措手倍難臣渥荷天恩畀以重任於沿江形勢無時不在心目中奈大營兵數不逾九千勇數不

逾三千且聞該逆見有南竄蘇杭之信尤不得不加意嚴防再難撥兵分攻亦難撥兵分守此

臣

所以日夜焦勞不敢明言而又不

敢不直陳者也又奏接據署提

臣

和春來文九月初八日傳集各

營分三路進攻鎮城初九日潮勇前赴南門攻擊該逆突出千餘來拒我軍誘至京峴山下分路鈔截斃賊百餘名並斃黃衣賊目一名忽北門突出二千餘賊分兩股來撲我軍奮勇直前刀矛並刺賊屍滿地該逆勢不能支飛奔過濠自卯至午約斃賊匪二百餘名砍獲首級十七顆生擒四名旋據探稱逆匪有十三日傾巢出撲之信當卽知會四川浙江各營及水師營均各準備是日南北兩門果突出三四千賊勢甚兇猛我軍同時鈔出三面夾擊槍礮環施並開放三百斤大礮斃賊數十名正在酣戰適水軍葉常春等分督廣艇浙江師船由南岸至北固山江神廟金山一帶賊

有大船百餘隻划船數十隻圍繞前來被我師船轟沈大小賊船十餘隻擊斃在船逆賊並火箭火罐燒斃者不少我軍乘勢趕至北門計共斃賊二百數十名生擒五名上諭前因三城久未克復降旨令該大臣於和春蘇布通阿二員內揀派一員帶兵過江北協同琦善等先克揚城次第收復鎮江金陵見在該大臣因鎮城賊勢漸形窮蹙催令和春管帶師艇各鎮將水陸夾攻亦係爲急籌克復起見惟兩日勝仗均不過小有斬獲總未大挫賊鋒似此日延一日師老餉匱實屬不堪設想見在賊匪由山西竄出擾及直隸近畿一帶經勝保追擊屢獲勝仗江省若不趁此迅籌進取儻皖楚賊匪乘閒又復北竄該大臣等但擁重兵爲賊牽掣坐視北省緊急不思赴援於心何安向榮接奉前旨應派何員帶兵赴揚協同攻克著卽密籌全局先其所急毋誤事機將此由六百

里諭令知之○向榮奏遵籌攻守事宜得旨汝之議論籌畫尙皆當時急務然金陵久踞之元惡逆首終未殲除汝尙藉詞搪塞何無恥之甚朕旣用汝惟冀汝速蕲偉績克膺懋賞汝竟以難辦入奏豈能任其猖獗耶汝之心地才力及汝之用心過人處朕無不知威望人言皆不可恃總以真仗真勝爲確據汝雖至愚朕料汝斷不肯以自己身家性命博眾人之譽及至國法臨身方悟爲眾人所誤也自己功業自己掙無須他人之力方爲國家之干城世間之奇男子○以靈桂爲內閣學士由正紅旗蒙古副都統遷○予江南陣亡縣丞銜劉守正祭葬世職○乙亥諭軍機大臣等寄諭湖廣總督吳文鎔等本日據青巒奏該逆大股撲到漢陽於九月十八日入城漢口一帶梗塞等語前諭駱秉章曾國藩酌派兵勇船礮迅赴湖北協剿並著台湧帶兵赴省以資援應未知何日可到該督籌

止可就見有官兵妥爲守禦以待援兵之至並將見在情形迅速奏報以慰朕懷又青麐奏稱賊至田家鎮已革同知勞光泰所帶潮勇倒戈相向以致官兵傷潰如果屬實亟應從嚴懲辦著該督等查明勞光泰如已通賊卽行凌遲處死再行奏聞如尙未通賊亦應科以軍律從重懲治至漢陽被陷文報驛站務宜設法繞道行走勿致疏失將此由六百里加緊諭令知之○諭據青麐奏考試德安聞賊匪已擾及漢陽見在督率地方官招募壯勇並傳諭紳士人等協力保衛等語該學政雖無地方之責值此賊氛逼近著卽暫駐德安督飭地方文武嚴密防堵賊匪已入漢陽府城不知武昌省城情形如何著卽迅速探明具奏所稱擊獲逃勇據供田鎮之敗係已革同知勞光泰帶領潮勇倒戈所致實堪痛恨勞光泰如已通賊卽由汝處將該犯解到凌遲處死再行奏聞如尙

未通賊自有該督撫遵旨嚴辦此時江面是否爲賊所踞南北驛遞文報應如何繞越行走俾免稽遲貽誤之處並著該學政酌量妥速辦理仍與吳文鎔崇綸等隨時互相知照毋失事機將此由六百里加緊諭令知之○諭呂賢基等奏報集賢關失守一摺賊匪竄擾安慶經張熙宇扼守集賢關自應布置周密何以逆匪自皖城分道撲出遽將該關失守是張熙宇等前次守禦之方毫無把握殊堪憤懣該逆旣向北趨而前此退出裕溪口股匪又有不久復來之語設令糾合來擾廬郡益形喫重奕經所帶官兵能否酌撥策應或臧紆青所募之勇可以前往協剿卽令該員帶領赴皖呂賢基擬赴廬郡扼守其桐舒一帶亦須布置妥協前往廬州與劉裕鈐竭力守禦常清所帶官兵計已到皖並著酌量調撥玉山見在何處未據呂賢基等奏報著卽飭令帶兵會剿毋稍遲緩

總以收復集賢關不令賊蹤乘虛北竄爲要袁甲三見署廬鳳道其所帶之勇可否一併調來以冀兵力厚集均著相機妥辦將此由六百里加緊諭知奕經呂賢基劉裕鈐並傳諭玉山袁甲三知之○諭前因賊近廬州授江忠源爲安徽巡撫諭令迅赴新任嗣據吳文鎔等奏報並未提及該撫是否已抵武昌甚爲懸繫本日據呂賢基奏逆匪分股由安慶徑撲集賢關兵勇盡力鏖戰因眾寡不敵敗退至練潭地方已諭令奕經呂賢基劉裕鈐籌撥兵勇前往攻剿集賢關扼要重地必須及早克復該撫接奉此旨著卽星夜啟程不分水陸趕緊赴任萬不可稍有延緩所帶練勇見在何處務令設法渡江以資攻剿和州一帶前由慧成撥兵令副都統常清帶往駐紮本日復有旨催總兵瞿騰龍帶兵前赴皖省協剿仍著該撫相機籌辦總以力遏賊匪北竄爲要將此由六百里

加緊諭令知之○以安徽集賢閣防守不力革前任按察使張熙  
宇五品頂帶陝西漢中鎮總兵官恆興革職仍畱任予陣亡遊擊  
賡音泰伍登庸祭葬世職○丙子諭軍機大臣等僧格林沁奏籌  
調官兵扼要堵截一摺西河一帶情形甚重該大臣令培成移紮  
王慶坨扼截惟培成所帶多係察哈爾之兵是否能獨當一面逆  
匪搬運木植恐未必專爲作筏或欲建立塞柵或欲平墊泥淖務  
須探聽確實以便攻剿奕紀所帶兵一千名又添撥熱河古北口  
兵八百五十名均應幫同天津官兵進剿不可但令守城置之無  
用之地達洪阿由捷徑赴天津係從何處行走必須趕到協剿萬  
勿遲延軍情旦夕不同總以相機布置迅將逆匪兜剿淨盡勿令  
分竄爲要另片奏該大臣親往天津籌商進剿事宜畱德勒克色  
楞暫駐大營覽奏甚不放心仍著僧格林沁折回楊村以資鎮守

並可扼要調度隨時與勝保知照毋失事機旋據文謙奏報初一日勝保大獲勝仗初三日奕紀已至天津見在賊在靜海之獨流鎮運取木石築壘以守又用馬四出窺探達洪阿必須趕緊到彼方可無誤汝總應仍回楊村爲是恐德勒克色楞不能禦賊北竄也本日據順天府奏大兵聚在東路涿州良鄉一帶空虛應如何兼顧之處著該大臣酌量情形妥籌辦理將此由六百里加緊諭令知之○江忠源唐樹義奏臣忠源自廣濟移營繞赴省城田家鎮潰散之兵亟須招集撫綏因念賊船上駛武昌十分緊急守城兵力又復單薄且賊既據有舟楫之利北可達襄陽西可抵荊州皆爲北路扼要之區是臣忠源單騎赴皖不如會兵援省兼可照顧襄樊北路因卽星夜督催各兵勇趕赴省城於巴河黃岡陽邏等處覓船渡江乃巴河賊船乘風先至臣將抵黃岡探知府城已

失又聞頭起賊船先已上竄漢陽失守江路賊船到處阻塞無從

飛渡於九月二十一日行抵黃陂縣

臣

樹義所帶防守廣濟之兵

一千餘名尙屬整齊其田家鎮招集之兵約二千名編定隊伍申

明紀律使潰散之餘復能自振卽日帶領馳赴漢陽以圖收復若

得與武昌夾江相持互爲犄角亦足牽制賊勢又探聞賊船多已

進泊漢水

臣

等已移知安襄鄖荆道羅遵殿招募襄陽義勇與

等聲勢聯絡如賊有窺伺襄樊之意

臣

等卽由德安馳赴上游一

帶扼要堵剿

上諭昨因賊匪擾及蘄州距省甚近當經諭令台

湧迅調滿洲兵二千名帶赴武昌救援本日據江忠源等奏省城

危急情形並探知黃州漢陽亦經失守該撫設法先圖收復漢陽

等語見在該省兵力單薄當此防剿喫緊之際著台湧迅將前調

官兵無分水陸星速帶往省城相機截剿該將軍兼署提督所有

綠營未經徵調之兵並著挑選勁旅酌量飛調派委得力將弁一併管帶前往以資夾擊萬勿稍涉遲延致誤事機並先將啟程日期飛速由驛奏報將此由六百里加緊諭令知之○諭湖北自田家鎮兵潰以後黃州漢陽均被賊陷賊船上駛省垣極爲危急凡川陝與湖北交界地方均關緊要必須一律嚴防著裕瑞舒倫保桂明張祥河迅卽各派官兵於湖北接壤各要隘嚴密防守實力巡查盤緝奸宄萬不可令賊匪闖入本日舒倫保奏挑備官兵摺內已批示如遇調撥卽令該將軍統帶見旣防備楚省舒倫保未可遠離陝境如有旨調撥所備官兵卽派協領並滿洲鎮將統帶啟行可也將此由六百里各諭令知之○諭昨因湖北軍情緊急諭令舒興阿馳赴楚豫交界扼賊北竄本日據江忠源唐樹義等奏逆匪已至黃岡府城失守賊船全泊漢水復據青麐奏探聞賊

於九月二十三日竄至孝感放火德安人民逃徙賊若由此北竄  
逼近豫境情形萬分喫重總兵柏山及徐廣縉所帶兵勇均屬單  
薄恐難抵禦舒興阿接奉前旨想已渡河而南著卽兼程前進直  
赴楚境迎擊與江忠源等兵勇併力堵剿萬不可任賊北竄郝光  
甲所帶之兵昨已有旨令該督調回備用矣沿途偵探楚匪蹤迹  
並該督何時可抵楚境隨時奏聞以慰懸念將此由六百里加緊  
諭令知之○諭本日據青磨江忠源唐樹義等奏報武昌被圍黃  
州漢陽兩府失守孝感縣亦有賊匪滋擾覽奏實深焦灼吳文鎔  
等前奏有帶兵勇於府城四面分駐之語見在是否駐紮城外抑  
已入城據守未據奏報倍深懸繫著卽將近日情形飛速入奏該  
督撫等務當激勵紳民兵勇竭力堵禦堅守待援以冀轉危爲安  
將此由六百里加緊諭令知之○諭江忠源等奏武昌被圍會兵

進剿並青麐奏賊勢逼近德安設法籌防各摺覽奏焦灼實深賊船布滿江路進泊漢水湖北武昌危急而德安襄陽緊接河南尤爲喫重江忠源既不能渡江赴省止有與唐樹義合兵先爲收復漢陽之計惟漢水賊船瞬息可到襄陽青麐所奏賊蹤已至孝感所有江北各路關緊自楚入豫大局江忠源等既在北路卽著扼要堵截一面商同羅遵殿所募義勇協力夾擊並號召各郡縣紳衿民勇趕緊團集合力堵禦見已諭令舒興阿帶兵由河南直赴楚境會剿江忠源等探知賊蹤所向何處緊急卽飛咨舒興阿由何路迎截與該撫等官兵前後夾攻庶可得力總不可令該逆再行擾及豫境爲要將此由六百里加緊諭令知之○諭昨因武昌兵單不敷剿辦諭令會國藩卽酌帶練勇馳赴湖北並著駱秉章籌撥軍餉諒該撫等接奉諭旨卽遵照籌辦矣本日據江忠源唐

樹義馳奏田家鎮兵潰之後賊船上駛武昌被圍等語武昌省垣情形萬分危急江忠源尙須先赴漢陽以圖收復未能卽抵武昌著曾國藩遵照前旨趕緊督帶兵勇船礮駛赴下游會剿以爲武昌策應所需軍餉等項著駱秉章卽設法供支以資接濟毋稍延誤將此由六百里加緊各諭令知之○丁丑勝保奏臣於九月二十七日<sub>至</sub>靜海縣地方將賊大股追及我兵隨追隨剿殺斃逆匪甚多賊卽遁入靜海城中臣因兵未到齊僅帶馬隊四百餘名步隊一千餘名未便攻剿卽在附近縣城五里地方紮營以牽制其北竄二十八日善祿西凌阿帶兵追到臣卽令在東南進攻臣由西南進剿直抵城關逆賊分向東南拒敵當卽督飭馬步各隊由河西向東南鈔擊賊遂大敗我兵乘勝斬殺賊匪奔逃入城初一日卯刻逆匪探知各營兵未到齊由南門運河東岸蠡擁而出雖

經西凌阿善祿列隊堵擊

臣

恐其兵單卽由西岸策馬渡河親往

督陣該逆復由南門擁出七八千人

臣

一面揮軍抵敵一面飛調

西岸德州西甯兵弁渡河接應鏖戰兩時之久副都統維祿明慶

均受槍傷尙不甚重馬步各隊四路鈔殺逆屍枕藉統計殺賊一

千餘名奪獲馬匹無數又奏

臣

此番由深州追剿逆匪慮其長驅

北犯卽由河間鈔赴青縣等處以期迅速而沿途積潦成河各州

縣地方遭賊蹂躪車馬無從覓雇糧米爲之一空士卒負重涉淺

枵腹奔馳艱苦萬狀及至靜海城外駐紮附近村莊非被賊擄卽

爲水淹人馬斷糧絕草者三日

臣

仰荷

天恩畀以重任每遇號

飢號寒之際卽宣布奉到兩次諭旨前次懷慶解圍在事出力文

武員弁准

臣

開單保奏

聖恩優渥各將士無不感激奮勉是以

此次開仗以飢寒疲乏之餘遇剿疾勇悍之寇一呼而進鏖戰終

朝卒能斬級千餘懾敵萬眾

臣

見飛飭德州青縣迅速購買米麪

就近接濟日內想可運到

硃筆諭欽差大臣勝保等本日據勝

保奏隨營將士於飢寒交迫遠道奔疲之際猶能奮勇殺賊一千

餘名之多皆由爾將士等同仇敵愾素懷忠義朕知賊匪必能迅

就殲除覽奏實深欣慰尤廑於懷惟願始終奮勇大功早成一日

我將士早膺一日殊恩爾等遠離家鄉音信隔絕朕非不知爾等

之心也著勝保將此硃諭與各大員看並曉諭圍營將士知之○

諭內閣理藩院奏舊土爾扈特扎薩克多羅貝勒達什車楞因逆

匪未靖呈請捐輸銀兩以備軍需一摺舊土爾扈特扎薩克多羅

貝勒達什車楞自行捐銀三百兩以備軍需足見惻誠朕甚欣悅

惟該貝勒自必藉此銀兩以備養贍伊所捐銀兩著毋庸賞收以

示朕嘉獎蒙古世僕體恤之至意○諭據勝保奏九月二十七日

至靜海縣地方追及大股逆匪沿途斬獲甚多賊卽遁入城中二十八日善祿西凌阿帶兵趕到由東南進攻勝保由西南進攻逆匪分股抗拒西凌阿善祿督帶馬步各隊迎擊勝保帶兵由河西鈔擊賊匪大敗我兵乘勢斬殺統計斃賊四百餘名奪獲賊船十一隻槍礮器械百餘件初一日逆匪由南門運河東岸蜂擁而出勢甚兇猛西凌阿善祿列隊堵擊勝保由西岸策馬渡河親往督陣該逆復由南門北門擁出賊眾約七八千人我兵分投前進奮力掩殺殲斃甚多逆匪復分數股撲來勝保飛調德州西甯兵并渡河接應鏖戰兩時之久馬步各隊四路鈔殺該逆紛紛倒地長髮紅衣賊匪死相枕藉統計殺賊一千餘名逆匪復逃入城中見飭官兵分布兩岸亟籌進剿等語逆匪自竄入直境雖屢經官兵進剿總未大受懲創此次傾巢而出經我兵合力夾攻大獲勝仗

洵足塞賊膽而振軍威勝保親歷行間督兵鏖戰實屬勇敢可嘉  
西凌阿善祿前因追賊落後降旨摘去頂帶拔去花翎此次督兵  
追剿尙屬奮勇西凌阿善祿均著賞還頂帶花翎副都統維祿明  
慶均受槍傷雖不甚重可見臨陣爭先著各賞給大荷包一對小  
刀一柄交該員等祇領見在參贊大臣僧格林沁統帶各路重兵  
扼要調度德勒克色楞達洪阿伊勒東阿奕紀等各帶精兵馳赴  
天津一帶會同勝保西凌阿善祿等乘勝圍攻務將逆匪卽日掃  
除淨盡毋令竄逸○袁甲三奏臣於九月十八日自潁上起程途  
聞周天爵已於十五日因病出缺趕抵王市集知捻匪因周天爵  
已故早圖蠢動二十一日據報有捻匪三四千人在阜亳交界之  
孫村店焚掠肆擾當諭該處團練扼要堵禦並飭署潁州府知府  
張清元等帶兵前往與委員李萼馨等會商進剿適署亳州知州

熊英亦奉札帶勇前來該文武督率兵勇於二十三日行抵高公廟遇捻匪三千餘人向我軍迎拒守備袁學忠等施放大礮將捻首姚矜兒轟斃復見眾捻中有黃巾賊目一人直撲我軍該文武督飭兵勇齊發火箭將逆匪藥簍全行燒燬並將該賊目砍斃又經遊擊朱連泰親督礮手四十隊李萼馨等督率團練四五千四面攻擊斬獲首級一百八十四顆轟斃八十七人生擒捻首李致汶等七人餘匪五十八人訊據供稱此次合五十八股爲一捻其中如穆老砍王長青宮元等數人均被官兵誅殺查潁郡捻匪結聚已久本年春夏以來焚殺搶掠百餘里內無一完室近復各樹旗幟擄掠壯丁竟欲效尤粵匪周天爵前在王市集各處接捕三百餘人擒首未獲者尙多難保不日久復聚已飭同知張家駒等分赴各路相機勦捕並出示曉諭令匪徒親族自行擒獻免其

連坐其偶被偏脅並非甘心爲匪之人准其取具改過保結予以自新之路連日捆送者均以數十計其阜境東南鄉毗連河南固息一帶亦有大股盤踞距此間幾二百里一時勢難兼顧臣此次所留官兵實止七百餘人專恃各鄉團練整齊鼓舞尙可設法勦辦惟臣不諳軍旅恐難肩此重任可否請旨簡派大員駐紮督辦以期迅就蕩平又奏據委員李萼馨回營面稟未獲擒首均竄匿雉河集一帶另股逆匪並於集外四面安設大礮豫爲拒捕地步該處界連蒙亳本爲賊淵藪本集擒匪另有數十股近多託名團練爲內應外合之計萬一誤用必致倒戈相向該匪等因此次受創勢將拚死抗拒卽幸而擊散東可竄入宿州西可竄入太和終爲地方之害臣見飭蒙宿亳太各地方官督勇會剿並將此地曾經與匪接仗結實可靠之團練選擇調用臣亦酌量移營前往督

率一面密遣安人設計離開再行相機進剿 上諭袁甲三接辦

周天爵剿匪事宜卽能分飭員弁激勵兵勇將大股擒匪迅速兜擊痛加勦洗辦理尙合機宜見在賊匪被創逃向雉河集仍圖嘯聚著袁甲三卽督率文武員弁兵勇乘此聲威迅將各股擒匪盡數殲除毋畱餘孽○諭軍機大臣等昨有旨令僧格林沁折回楊村以資鎮守茲據該大臣奏稱探聞逆匪奪有船隻恐其由上西河北駛見在仍紮營楊村等語與朕意符合此時該逆盤踞靜海據稱飭令達洪阿赴津與奕紀帶兵會同勝保南北夾擊布置甚合機宜本日復據勝保奏初一日大獲勝仗賊匪竄回靜海城中惟勝保所帶兵力尙覺稍單必須前後夾攻迅圖勦滅萬不可任賊築壘立柵又成死拒之勢達洪阿此次進兵太覺遲緩著卽飭催帶兵迅赴天津與奕紀所帶官兵飛速向前與勝保西凌阿善

祿等南北夾攻毋再遲延至德勒克色楞所帶東三盟兵並伊勒東阿綳閣等所帶之兵及慶祺所帶盛京官兵應如何分布之處均著與勝保知照察看賊情妥籌調遣均不可以有用之兵置之無用之地勝保所奏摺片著鈔給閱看將此由六百里加緊諭令知之○諭勝保奏兩次大獲勝仗各摺片覽奏甚慰逆匪在靜海城外拌死衝突經該大臣策馬渡河親身督陣以少擊眾大振軍威實堪嘉尚昨據文謙等奏探聞賊在南運河沿距靜海八里許地方紮成木壘內實以土開列六門爲踞守之計本日該大臣具奏情形似逆匪全股俱在靜海城內屯聚究竟此時賊眾聚集何處是否全在靜海天津兵勇足資抵禦該大臣惟有激勵將士迅催奕紀達洪阿由天津赴靜海會同夾攻以期迅殄羣醜萬不可令賊築壘自固又延時日儻被勦紛竄應於何路扼要布置堵截

著與僧格林沁妥商辦理另片奏軍糧匱乏該將士等尙能踴躍用命殊堪軫念發去硃諭一道著傳示軍營俾知朕意軍中所需米麵並著該大臣傳諭河閒府知府吳廷棟就近趕緊購辦源源接濟附近各屬倉社穀米均准軍營動用勝保摺尾有布置周妥分兵南赴汴梁之語自係統籌全局而言此時情形必以肅清畿輔爲要未可分身遠涉也初二日所發奏報何以初六日始到沿途因何稽遲著卽查明嚴飭地方驛遞以後必須按限催送毋任遲延致干重咎將此由六百里加緊諭令知之○諭琦善等奏連日圍攻情形一摺揚城賊匪窮蹙已極城外礮臺業經築竣正可乘高下擊晝夜環攻克復揚城毋任他竄見在江面上游一帶賊船分竄安徽集賢關及湖北黃州漢陽各府均被竄擾若不趕緊合力進取儻皖楚賊匪乘閒北竄該大臣等豈能株守一隅置大

局於不顧昨有旨令瞿騰龍帶兵二千迅援皖省復命向榮派提鎮大員渡江助攻揚城該大臣等若能趁此圍攻力圖克復則移兵皖省江北一帶可望肅清轉罪爲功在此一舉懷之勉之將此由六百里加緊各諭令知之○諭袁甲三奏勦辦阜毫巨匪獲勝一摺阜毫交界地方捻匪經袁甲三督率兵勇大獲勝仗兇燄已挫惟捻首未獲者甚多見仍嘯聚雉河集地方著卽乘此聲威痛加勦洗務將全股捻匪盡數殲除毋貽後患前據呂賢基等奏集賢關失守已有旨諭令奕經酌撥官兵策應並令袁甲三帶勇協勦如阜毫一帶捻匪勦辦事竣卽當相機應援以杜逆匪北竄之路劉裕鈐見署巡撫袁甲三見署藩司均屬責無旁貸著卽統籌全局激勵兵勇迅將逆匪與捻匪次第掃除勿令勾結將此由六百里加緊各諭令知之○賞兵科給事中袁甲三三品卿銜署安

徽布政使○以打仗愧奮賞還直隸提督陳金綬頂帶○戊寅諭  
軍機大臣等勝保奏連日催兵未到西北未能合圍一摺覽奏曷  
勝焦急據稱連日布置堵截該逆回竄之路並派總兵經文岱帶  
兵由王家口繞赴天津調取礮船圍剿並飛調多爾濟那木凱馳  
赴楊芬港張莊一帶聽候調撥達洪阿赴天津隨同合剿並調慶  
祺馳赴王家口駐紮以扼其西竄文安大城之路多爾濟那木凱  
達洪阿迄今並無信息等語見在賊踞靜海縣亟須四面圍攻以  
爲一股殲除之計昨有旨諭令僧格林沁催多爾濟那木凱達洪  
阿帶兵前赴天津聽候勝保調遣該員等帶兵行走何以如此遲  
緩當此事機萬分喫緊之時豈無天良若是著僧格林沁傳旨飛  
催毋得再有遲延致干重咎並將該員等何日抵津迅速奏報又  
據順天府奏武清縣詳報盤獲逆匪胡羣等供出逆夥王得等均

往西南逃走等語該大臣卽嚴飭軍營地方文武員弁一體嚴拏毋稍疏縱勝保摺並順天府摺均著鈔給閱看將此由六百里加緊諭令知之○諭勝保奏馳抵天津相機督剿一摺逆匪竄入靜海連次被創仍盤踞獨流鎮楊柳青一帶並於獨流鎮兩岸紮立木城意圖抗拒勝保見在調撥各路官兵擬與善祿西凌阿前後夾擊著卽激勵將士剋日進剿務須偪入一處合力圍攻盡數殲除萬不可再令他竄達洪阿多爾濟那木凱經該大臣調赴天津見在行抵何處當此攻剿喫緊之際豈容任意延緩已諭知僧格林沁嚴催前進並著該大臣再行飭催毋任遲誤昨據慶祺奏畱吉林兵七百五十名防守河間此項官兵均係勁旅應否調至軍營著該大臣酌量派撥至佟鑑所帶礮位並著催提以資攻擊將此由六百里加緊諭令知之○諭寄諭欽差大臣向榮據李嘉端

奏池州被賊占踞請撥兵協剿等語覽奏曷勝憤悶安徽池州府城四面通江據稱咨商該大臣將江西撤回之兵安置池郡該大臣已飭音德布統帶川滇兵勇在蕪湖一帶駐紮至今尚未到防安省南北兩岸皆係賊踞情形十分危急集賢關又已失守防堵綦嚴江北實屬無兵可撥該大臣統帶之兵屢經分撥亦覺稍單音德布帶領江西折回之兵能否迅速援應殊堪懸繫著卽權衡緩急酌撥將弁帶兵赴援萬不可任賊竄踞又致蔓延將此由六百里加緊諭令知之○命恭親王奕訢在軍機大臣上行走○以禮部尙書麟魁爲總管內務府大臣勿庸在軍機處行走命戶部右侍郎瑞麟禮部左侍郎穆蔭均在軍機大臣上行走○庚辰諭內閣王懿德奏剿匪遲延自請嚴議一摺福建土匪竄擾廈門數月未能收復實屬延緩福建巡撫王懿德水師提督施得高均著

交部嚴加議處原任浙江提督李廷鈺前經賞給二品頂帶飭令協同剿匪耽延時日咎無可辭念係在籍人員著先行交部議處以示薄懲該員曾任提督儻能奮勉立功保衛鄉里尙可重邀恩賞如仍不知愧奮定當從嚴懲辦○諭軍機大臣等王懿德奏督剿土匪情形並請嚴定期限及酌留艇船各摺片已降旨將該撫等分別嚴議議處矣閩匪滋擾漳泉各郡已逾數月廈島尙未收復仙遊復被占踞該撫見駐泉州亟應督同紳士並飭水陸將弁剋期剿滅以靖地方李廷鈺因其係在籍人員是以僅予薄懲仍著該撫加以激勵儻能奮勉圖功尙可重邀恩獎若始終瞻徇取巧卽行嚴參懲辦並著嚴飭提督施得高督率水師鎮將併力攻剿迅掃賊氛毋稍延玩前調廣東紅單船隻本爲江南剿賊之用豈可久畱閩省致滋貽誤著王懿德卽將吳全美所帶二幫艇船

十四隻飭令迅速駛赴江南毋再稽緩捐輸一事著隨時設法勸諭該省紳民果能量力輸貲保衛鄉井朕必破格獎賞紳士林國芳已賞加鹽運使銜並賞帶花翎以示鼓勵該撫仍當剴切宣諭地方官紳合力同心迅除醜類以慰塵懷將此由六百里加緊諭令知之○諭僧格林沁奏移營布置情形一摺本日據勝保奏稱賊匪由獨流逼近楊柳青該大臣不及待兵到齊先行進剿獲勝見在紫營楊柳青街外飛調達洪阿等官兵前進等語該逆復經痛剿退回獨流與靜海城內之賊互爲援救非大兵迅速會集兜擊恐其窮極思竄達洪阿旣已趕到著卽令其遵照疊降諭旨趨赴勝保大營聽候調度萬不可令其遠處屯紮坐失機會其天津西北一帶應如何分撥官兵扼要嚴防並著該大臣妥速布置毋任逆匪乘虛他竄將此由六百里加緊諭令知之○諭據吳文鎔

崇綸奏嚴守省城一摺賊船乘風竄泊武昌迤北之塘角江面旋駛往對江之漢陽府城外及漢口鎮兩岸肆行焚掠該督撫等見已入城堅守著卽會同在省文武將見到之兵勇妥爲布置臬司唐樹義前已帶兵行至黃陂本日復飛諭該員星速帶兵回省以資堵剿能否覓船徑渡並著吳文鎔等設法派員迎催前進其從前救援江西之湖南候補道夏廷樾所帶兵勇數千名尙未撤歸著該督迅卽飛咨張芾飭令該道卽日帶兵赴援萬勿稍誤事機至所需餉銀已諭知裕瑞迅由四川省籌撥接濟矣計日援兵齊集卽可將此股逆匪痛加剿洗此時武昌省城情形萬分危急朕南望不勝懸念該督等惟當登陴固守以待援兵勉之張亮基交卸後是否已啟程前赴山東新任著卽查明具奏將此由六百里加緊諭令知之○諭吳文鎔等奏嚴守省垣情形一摺前據江忠

源等奏稱江面梗阻未能渡江諭令卽在江北扼截賊匪北竄之路見在該逆已將停泊省城塘角江面之船全行開至漢陽城外及漢口鎮兩岸計船約有六七百隻該督撫等登陴固守雖經江西赴援兵勇到有二千餘名兵力尙單省垣危急唐樹義係本省臬司所帶各兵尙可得力卽著設法迅速繞赴省垣協同防守前經疊諭舒興阿帶兵由河南直赴楚境會剿不日卽可趕到江忠源見係安徽巡撫皖省見在情形亦甚喫緊此時台湧若由荊州帶兵已抵安陸則江北一帶有員駐紮尙可相機策應著該撫斟酌緩急仍以速赴新任爲是皖省自集賢關失守後安慶賊蹤已有北向廬州之意池州復又被賊占踞朕心殊深懸繫諒該撫必能通籌全局先其所急也將此由六百里加緊諭知江忠源並傳諭唐樹義知之○福建巡撫王懿德奏紳士郭柏蔭等請將紅

單船暫聞勦賊得旨閩省生民朕豈忍置之不顧但粵艇專爲肅清江面較量全局孰輕孰重自可立見况艇船爲數並不甚多合之尙恐無濟分之必更單薄兩處貽誤罪將誰諉該紳士所見甚小止知顧伊等本地汝爲閩省大吏何無定見若是亦何畏紳士掣肘膽小若是朕殊不解此時雖嚴旨再催已覺遲緩○壬午諭內閣恭親王奕訢孫瑞珍等遵旨會審已革山西巡撫哈芬並呈遞該革員親供一摺哈芬身任大員當賊匪竄入晉省不能豫防已有應得之罪况軍務正在喫緊之際尙負氣爭能與郭夢齡互參亦屬見大忘小意見鄙狹至供稱該藩司有意誣陷更不成話一巡撫呼應屬吏不靈可見平日整飭無方伊覺非伊之咎正不知是伊之大負委任處也餘款曉曉置辯不足與較著毋庸議哈芬係地方大吏失守城池罪止革職但該員不知承受朕恩種種

紙繆實屬糊塗之至哈芬著發往軍臺效力贖罪○諭前有旨將舉人臧紆青以通判補用茲據奕經奏稱該舉人願赴會試不敢驟邀官職臧紆青著賞給同知銜仍令管帶壯勇以資防剿所有前次賞給通判畱於安徽補用之處著卽行註銷○諭軍機大臣等寄諭參贊大臣僧格林沁本日據勝保奏見籌圍剿逆匪情形並繪圖呈覽布置尙屬周妥惟據稱達洪阿於初九日帶兵七百餘名來營等語該逆分踞靜海獨流二處意欲分我兵力必須大兵雲集四面合攻方可一鼓殲除著該大臣將達洪阿未到之兵一千餘名飭令趕赴勝保軍營以備調撥毋再遲誤此時自以速殄逆匪爲要若前路進剿得手則後路防守自可無虞僧格林沁專爲屏障京師酌畱兵將所見亦是第勝保大營若能多兵迅擊此股逆匪無難殄滅前路獲勝後路自安汝必能見到及此況汝

之忠忱朕素深悉總以國事爲重斷不至稍有齟齬本日覽勝保摺多有謂汝不能與伊和衷朕知汝之心無他也該大臣與勝保共辦一事務須仰體朕心合力同心肅清畿輔以副委任勉之望之將此由六百里加緊諭令知之○諭據有鳳奏賊匪圍攻興化仍退踞仙遊楓亭等處請撥兵籌餉一摺賊匪盤踞楓亭仙遊尙未收復攻撲興化府城之賊經提督炳文總兵鍾寶三會同守城兵勇夾擊敗退該將軍復調郭仁布等前往合剿諒可得手惟該處距省甚近且該逆又欲來永福窺伺省垣亟宜設法派兵防禦毋稍疏虞江西省城雖已解圍而湖北安徽賊蹤紛擾仍須防其北竄本日已諭令張芾酌量情形抽撥援應閩省但恐江西兵力未能兼顧該署督等惟有督飭所屬認真勸諭團練保衛地方並嚴飭官兵相機剿辦不可坐待援兵致失機會至另片奏據王懿

德谷稱進剿仙遊陣亡受傷兵弁不少等語鄉勇句通賊匪情節可惡必當痛加剿辦已革遊擊周兆麟是否陣亡竝著該撫查明具奏將此由六百里諭令知之○諭本日據有鳳奏賊匪竄擾興化盤踞仙遊請添兵籌餉等語前因福建會匪滋擾先後諭令葉名琛等調撥精兵二三千名並籌撥兵餉三十萬兩解赴閩省以資接濟諒已遵照辦理矣茲據有鳳奏稱廣東僅撥兵五百名粵餉亦僅解到二萬兩等語閩省攻剿正當喫緊之際兵餉在所急需見在鄰近省分無兵可撥著葉名琛柏貴迅速挑撥精兵二千名派委得力將弁赴閩協剿仍著該督等先行籌撥餉銀十萬餘兩委員速解閩省以濟要需將此由六百里諭令知之○諭奕經奏皖北緝匪防逆均關緊要一摺潁州土匪經袁甲三督率遊擊武全等痛加剿洗餘黨逃匿雉河集該侍郎已飭遊擊李成虎帶

領賊紆青馳往勦辦著卽飭帶兵各員迅將土匪全數殄滅勿令日久蔓延爲患袁甲三見署安徽藩司地方事宜是其專責該侍郎卽與該員隨時商辦扼要駐紮總期迅勦土匪並嚴防逆賊紛竄是爲至要奕經見在患病著賞假二十日安心調理徐州防勦事宜暫交百勝王夢齡恩錫等代辦遇有緊要事件仍須親身經理不可諉卸滅紆青已賞加同知銜仍著傳旨飭令該員督率練勇協同官兵認真勦辦如果始終奮勉不難再邀恩敘也將此由六百里諭令知之○以韓椿爲福建按察使

由浙江鹽運使遷

○以湖南

道州江華永明嘉禾桂陽郴州永興七州縣城被賊竄陷革布政使恆福等職前布政使潘鐸等降調有差○甲申諭內閣勝保奏攻勦獨流逆匪大獲勝仗一摺逆匪自經官兵於楊柳青地方痛加勦洗全數竄踞靜海獨流兩處勝保督帶官兵並達洪阿奕紀

所帶官兵於十一日辰刻直抵獨流賊巢用大礮連向賊壘轟擊該逆傾巢撲出我兵分東西兩岸衝殺西岸出賊二三百名爲達洪阿等攻擊敗退東岸逆匪甚眾亦經各路官兵轟斃二百餘名該逆復敢從東面擁出馬隊數百自深林鈔出衝入河州官兵隊中勝保望見賊旗甚近親身督帶吉林黑龍江官兵向東飛奔步行掩殺河州天津各兵見勝保督兵接應亦各奮勇鈔擊槍斃帶馬隊穿黃馬褂賊目一名賊眾大潰奕紀亦帶兵接應佟鑑所帶銅礮從旁轟擊立將乘輜指揮逆眾之賊目擊斃並槍斃轎前執大黃旗之賊統計是日殺賊五六百名此次進剿逆匪我兵馬匹尙未到齊當賊眾衝入河州隊中欲將天津各隊圍裹其勢頗爲兇悍該大臣揮眾步行督戰各隊官兵人人用命奮力攻擊遂致賊眾披靡殲戮甚眾覽奏實深嘉慰著發去黑狐骹馬褂一件珊瑚

瑚豆大荷包一對交勝保祇領該大臣卽督率達洪阿奕紀佟鑑  
及慶祺經文岱所帶官兵礮船四面兜圍將獨流逆匪悉數殲除  
並與西凌阿善祿等將靜海逆匪一律殄滅以靖畿疆古北口提  
標兵目海騰雲首先撲入林中將執旗之賊槍斃以致手受矛傷  
外委虎世德用槍擊中坐轎指揮賊目均屬奮勇可嘉均著賞給  
六品頂帶並賞帶藍翎以示獎勵○諭軍機大臣等勝保奏攻剿  
獨流逆匪大獲勝仗一摺該逆大股馬匹船隻聚集獨流其踞靜  
海城內者不過十之二三該大臣大營逼近獨流此次痛加剿洗  
賊膽已寒正當乘此機會盡力攻擊或先行收復獨流或分兵並  
取靜海該大臣相機調度卽行勦辦所有馬隊各官兵著卽飛催  
前進並督飭各路帶兵大員四面圍攻務將此股逆匪殲除淨盡  
毋令竄逸如能將靜海城內股匪飭令西凌阿善祿與獨流官軍

同時攻打俾該逆兩處不能互相救援剿辦更當得手該大臣疊受朕恩與軍士誠意相孚定能計出萬全剋期奏捷尤須倍加奮勉並剴諭各營將領同心協力迅掃妖氛自當普邀恩獎慶祺經文岱所帶礮船應如何聯絡接應之處仍隨時酌量布置如賊匪被剿窮竄必須嚴密堵截斷不可任其免脫擊斃乘輜賊目係何姓名可於生擒賊匪內訊供具奏此次接仗據稱東岸係奕紀帶兵接應當賊匪撲入河州隊中奕紀帶領旗營官兵一齊掩殺頗爲出力著該大臣查明酌量保奏將此由六百里加緊諭令知之○呂賢基等奏已革臬司張熙宇等督率兵勇收復集賢關可否以功抵罪得旨張熙宇等此次尙屬出力然賊眾並未大受懲創仍著督催進剿若果奮勉不但開復處分頂帶猶應分外加恩是時若卽行開復未免過優○乙酉諭軍機大臣等據吳文鎔等奏

賊匪盤踞漢陽漢口省城危急一摺覽奏曷勝焦灼逆匪占踞漢陽江面梗阻此時自應急攻漢陽以掣賊勢江忠源見已諭令暫留湖北督帶兵勇進剿漢陽城賊匪並令唐樹義設法渡江與該督撫等合力守禦台湧自荊州帶兵赴援不知見抵何處前已疊降諭旨令舒興阿由河南馳入楚境督兵援應本日復催令前進計日當可趕到夏廷樾所帶兵勇數千已諭張芾飭催該員迅赴武昌會國藩亦可由湖南帶勇赴援該督等嬰城固守惟有激勵將士兵勇盡力捍禦以待援兵前諭裕瑞於四川撥餉銀數萬兩先爲接濟該督等卽行飛催可也將此由六百里加緊諭令知之○諭前因賊匪竄踞漢陽一帶武昌省城危急諭令舒興阿帶兵由河南直入楚境赴援本日據陸應穀奏稱湖北賊匪探由漢陽分爲兩股一竄嘉魚之牌洲一竄蔡店窺伺德安江面賊船圍攻

武昌文報不通孝感已被占踞黃陂澠口均有賊匪等語見在武昌危急必須先將漢陽一帶賊匪剿除既可以杜其北竄之路並可以解省城之圍舒興阿已行抵汴梁著卽帶兵確探賊蹤迎頭截擊前在懷慶畱防之甘肅提標遊擊王定堃管帶官兵五百八十名卽著交舒興阿軍營酌量調遣郝光甲所帶之兵前有旨令調至該督軍營著卽飛速催調勿任遲延將此由六百里加緊諭令知之○諭前因安徽地方緊要諭令江忠源前赴新任見在安徽集賢關業已收復巢縣賊匪退去皖省情形較緩而楚北賊勢猖獗江忠源著暫畱湖北統帶兵勇迅赴漢陽一帶直搗賊巢設法克復以爲武昌聲援此時省城望援萬分緊迫若我兵急攻漢陽亦可牽制賊勢以解省圍唐樹義係本省臬司仍應設法渡江與該督撫等併力守禦此時德安情形如不甚喫緊自應移兵先

其所急舒興阿由河南帶兵入楚江北諸郡當可聲勢聯絡遏賊北竄總以統籌全局保衛省垣爲要將此由六百里加緊各諭令知之○丙戌諭內閣勝保奏攻剿獨流逆匪續獲大勝一摺十三日勝保親督天津正定河州宣化西甯各隊分路進攻該逆盡在南面隄上蟻聚約有一二千人天津河州隊伍先行撲入逆匪放礮抵拒我兵奮勇回擊達洪阿帶領健銳火器兩營兵弁一齊進攻極爲奮勇逆眾旗倒馬奔死相枕藉各營官兵聯隊掩殺勇往爭先佟鑑復用神威銅礮向西橫擊經文岱松玉亦帶礮船接應同時夾攻文謙帶勇督運大礮轟擊逆眾不敢抗拒奔回木城其木城外賊匪均被我兵擊斃奕紀在西岸用擡槍斃賊數十名復開放八千斤大礮轟毀賊營望樓又用炸礮打入賊壘統計斃賊千餘名逆匪竄踞獨流負隅死守經我兵三戰三捷其勢已極窮

蹙勝保調度有方各路帶兵大員及將弁兵勇均能用命深堪嘉  
尚著發去金鞘牙柄小刀十把銀鞘牙柄小刀十把銀鞘玉柄小  
刀十把小荷包二百箇火鑱十三把著勝保擇其奮勇出力者傳  
旨分別賞給並將疊次打仗出力之各員弁兵勇查明保奏候朕  
施恩該大臣務卽督飭各路官兵乘此軍威迅殄羣醜毋令竄逸  
○諭軍機大臣等本日據勝保奏十三日督兵進剿獨流逆匪大  
獲勝仗斃賊千有餘名惟該逆窮極思竄西南湖水空闊無際雖  
經各路兵勇堵截仍宜嚴防又據御史王兆松奏餘匪窮蹙勢必  
又圖他竄薊州重地必應嚴密設防馬蘭鎮兵弁無多請派兵於  
北路堵禦各等情薊州一帶空虛然賊未必卽肯東竄嚴密防堵  
不可稍涉張皇反啟其覬覦之心並著傳諭德勒克色楞亦可兼  
顧東路此股賊匪總須於靜海獨流一帶兜剿淨盡儻被剿餘匪

紛竄著僧格林沁與勝保隨時酌量情形派兵扼要堵截毋得稍有疏虞將此由六百里加緊諭令知之○諭勝保奏續獲勝仗一摺已明降諭旨頒給賞件分資將士並令將出力各員弁兵勇查明保奏以示獎勵矣逆匪在獨流一帶負隅固守此次又斃賊千有餘名賊勢日見窮蹙該大臣因西面湖水空闊添派各兵扼要堵截又催西凌阿善祿進剿靜海賊匪以分賊勢布置均合機宜惟賊情詭譎勢又剽悍見既刻刻思竄難保不冒死狂奔又如懷慶及洪洞城外詭計該大臣務當嚴飭各路將弁兵勇嚴密堵截無稍疏虞靜海城中賊匪無多卽飭令西凌阿善祿趕緊克復移營前進與獨流官兵合力夾擊萬不可稍涉遷延致誤事機再據阜保奏聞逆匪火藥鉛丸俱盡宜嚴防賄買等語著卽嚴飭各營將弁將火藥鉛丸妥爲收藏隨時稽查並嚴防奸細賄買兵勇盜

賣等弊聞天津勇目劉積德係監禁回民經天津縣知縣謝子澄從獄中提出派令帶領鄉勇幫同官軍殺賊甚屬得力是否屬實著查明據實保奏將此由六百里加緊諭令知之○諭前因武昌危急諭令曾國藩趕帶兵勇船礮駛赴下游會剿並諭令駱秉章設法籌餉接濟諒已遵照辦理本日據江忠源奏孝感業已收復漢川賊匪亦聞風下竄見在澠口紮營派員於牛湖搭造浮橋進攻漢口十月初五日擊沈賊船數隻斃賊多名因無船隻不能追趕等語湖北情形緊要見已有旨令江忠源暫畱剿賊著曾國藩將選募擬赴江西之楚勇六千名迅卽酌配礮械籌雇船隻卽由該侍郎督帶駛出洞庭湖由大江迎頭截剿俾江面賊船肅清不特兩楚門戶藉可保衛並可杜賊紛竄豫省及秦蜀之路想曾國藩與江忠源必能統籌全局也將此由六百里加緊諭令知之○

江忠源奏據探賊踞漢陽賊船由漢水上駛有窺伺西北之勢旋接學臣青馨咨稱賊從潰口雲夢水陸竄犯德安又聞漢川孝感先後失守自當卽行馳救以遏北竄之路又探賊匪有由武口分股竄擾黃陂之信卽撥兵五百名畱防黃陂將所餘兵丁千人派楊昌泗管帶星夜馳赴德安臣卽隨後策應行至中途探聞潰口雲夢之賊均已聞風竄回當派副將駱永忠帶兵五百赴德安防守將楊昌泗所帶之兵調回以資攻剿旋接黃陂縣稟賊於九月二十七日竄犯該縣經張金甲帶兵督剿擊毀賊船二十八隻生擒賊匪十六名殺斃溺斃者甚多餘匪逃散臣等卽帶兵就近收復孝感擬卽馳赴漢川進攻漢陽旋聞漢川賊匪亦已聞風下竄因進至滸口紮營派員於牛湖搭造浮橋進攻漢口十月初五日擊沈賊船三四隻奪獲大船一隻殺斃賊匪十餘人沈溺無算因

無船隻不能追趕

臣

疊奉寄信諭旨命

臣

馳赴皖省剿賊皆在

臣

奏報田鎮失事賊匪上竄之前見在楚北賊勢方盛唐樹義帶兵

無多必須暫行幫同料理俟一二日營壘立定浮橋造成進攻較

有把握

臣

卽遵旨前赴安徽得旨已有旨暫畱汝在湖北剿賊茲

覽汝奏適相符合武漢最爲緊急設法分路剿洗兼杜北竄亦應

防其西竄該逆匪卽時北竄患雖速尙易爲力若任其擾及秦蜀

則大事無了局矣○丁亥山東巡撫張亮基奏報行抵河南卽赴

新任並豫陳東省可慮情形得旨山東情形固屬棘手朕已命汝

巡撫山東自應竭力籌維朕知汝之心未必竟敢豫存站腳地步

若兵餉一節汝尙未到卽言其難汝到之後除束手而外止有請

帑而已此等疆吏雖有若無朕甚爲汝愧極○戊子諭內閣惠親

王軍機大臣會同刑部定擬訥爾經額罪名一摺已革大學士直

隸總督訥爾經額經朕特授爲欽差大臣督兵馳赴河南剿辦逆匪自懷慶解圍逆匪西竄後所有直隸與鄰省毗連各要隘宜如何嚴密防守乃於臨洛關遇賊竄至卽退廣平毫無籌策以致逆匪紛擾畿疆該革督統轄全省貽誤事機實屬罪無可逭訥爾經額著照惠親王等所擬按律定爲斬監候秋後處決○向榮奏據探十月初四日有賊船三百餘隻由蕪湖江口竄入甯國府屬之灣沚擄掠米糧臣恐其擾及東壩鈔我後路致驚蘇杭且慮東壩從前派去防堵之廣東兵八百名福建兵五百名不敷堵禦不得已抽撥兵勇二千二百名遴委總兵德安已革提督鄧紹良等統帶於初七日馳赴東壩先扼要隘再相機迎剿務須遏其竄往蘇杭之路大營亦可無後顧之虞上諭軍機大臣等該大臣攻剿金陵賊匪半載有餘該逆屢次竄出擾及上游江西安徽各省是

金陵城內賊匪所存無多疊經諭令向榮迅圖克復而江鎮兩城賊匪至今負隅死守如故師老則調遣愈難餉匱則轉輸不繼該大臣受朕厚恩膺茲重寄坐延時日能無愧心見在廣東撥解紅單船隻先後可以駛入長江前有旨諭令設法提赴上游遏賊江面往來之路或先行收復鎮江翦其羽翼亦可以孤賊勢如果南岸得手則揚城股匪便無援應更易掃除此時趕緊進攻該大臣已不免糜餉勞師之咎若再因循遲誤自問當得何罪近日直隸境內賊匪經勝保連次追剿擒斬甚多該逆竄伏靜海獨流旦夕可以剿除淨盡若待勝保統兵南向直擣賊巢該大臣尙有何顏復見朕乎從前所降硃批及寄信諭旨均於責備之中寓有成全之意原以該大臣老成宿將必能爲朕分憂自桂林解圍以至武昌將該逆窮追南竄該大臣與諸將士卒皆艱難朕夙夜在心特

懸不次之賞以待奏凱酬庸乃竟於抵金陵後一味遷延不知朕宵旰焦勞之苦是向榮無福受朕恩眷言之殊堪憤憤如能感激愧奮速行籌攻一有克復捷音爵賞仍不難立予也前命該大臣於和春蘇布通阿二員中酌派一員赴揚州會剿茲據百勝等奏奕經因病出缺該處地居扼要近界廬鳳一帶土匪出沒無常逆船雖退出裕溪口而窺伺北竄之詭謀未必盡絕此時自應先其所急著向榮於和春蘇布通阿二員內趕緊派令一員先行馳赴徐州統帶奕經所領之兵協同防守並可保護宿遷糧臺又片奏賊船三百餘隻由蕪湖竄入灣沚擄掠米糧難保其不擾及東壩覬覦蘇杭著卽照議撥兵馳往扼守萬勿貽誤將此由六百里加緊諭令知之○諭向榮等奏軍餉告匱一摺據稱浙江江西等省應解餉銀節次催提解交均未及半江蘇省僅解過銀二萬兩九

月分軍餉不敷支放急須接濟等語本日已飭戶部於應解餉銀各省迅速催解惟江路梗阻稍遠省分恐不能剋期解到著怡良許乃釗迅卽妥籌於蘇省下忙地丁及關稅銀兩內趕緊籌撥先其所急此外無論何款如有可動支者卽設法儘解以濟要需斷不可稍有遲延致誤大營軍餉至上海被匪徒竄踞業經兩月有餘尚未收復前據許乃釗奏親督大營官兵馳往勦辦月餘未據奏報殊切懸繫上海爲通商要口且來年辦理海運江浙兩省漕糧均須及早雇備船隻趕緊開兌若不將匪徒剋期勦滅必致貽誤大局所關甚重著許乃釗卽督同吉爾杭阿吳健彰等迅速督兵勦辦卽日收復毋再延誤將此由六百里加緊諭令知之○諭百勝王夢齡奏侍郎奕經因病出缺請簡大員來徐督辦等語已諭知向榮於和春蘇布通阿內酌派一員赴徐州接辦防堵事宜

第恐一時未能趕到見在皖匪未盡徐宿總扼南北之衝情形緊要楊以增本有防河之責著卽就近兼顧徐州一帶稽查防堵事宜其調兵募勇一切均遵照前寄奕經諭旨並與百勝王夢齡等體察地方情形相機辦理刑部員外郎上行走恩錫係奕經隨帶之員著仍畱徐州差委毋庸回京將此由六百里加緊諭知楊以增並傳諭百勝王夢齡知之○予軍營病故刑部右侍郎奕經祭葬卹廕○以文瑞爲刑部右侍郎

由左副都御史遷

○己丑諭內閣翰林

院侍講學士晉康奏部議失守城池各員分賠銀米如一年數月內全完應否免罪請旨定奪一節斷不可行等語所奏甚是軍營賞罰必應嚴明守土各員果能均如汴梁懷慶之竭力守禦轉危爲安朕必優加懋賞若庸劣之員平日旣漫無準備臨事復藉詞脫逃竟有棄城不顧委銀米以資賊者喪心昧良實堪痛恨若復

加之寬典何以整飭紀綱所有失守城池各員除將銀米勒賠外仍著各治以應得之罪毋稍寬縱○諭勝保奏進攻靜海連獲勝仗等語據稱本月十五日西凌阿善祿攻勦靜海賊匪轟毀城上木柵三處木城一座逆匪擁出抗拒兵勇奮力齊撲傷斃逆匪多名該逆潛從南門撲出千餘經副將孔廣順遊擊成明范維清薩爾善都司薩炳阿文奎王建功等各帶兵勇四路夾擊殲斃賊匪二三百名十七日派撥正定天津等營官兵至靜海城北與西凌阿善祿合力夾攻該逆分三股蜂擁鈔出我兵奮勇回擊斃賊三四百名其奔回墜濠復被我兵殲斃者甚眾逆匪分竄靜海獨流意在負隅抗拒分我兵勢見經大軍兩處痛加勦洗其勢已極窮蹙該大臣等仍當乘勢合力進攻悉數殲除毋任竄逸○諭袁甲三奏見在勦辦捻匪未能兼顧地方事務等語前降旨賞加袁甲

三三品卿銜並令署理安徽布政使該給事中尙未接奉諭旨茲據奏稱劉裕鈐奏請以該員署理藩司見在勦辦潁郡擒匪正當喫緊之際一經署理地方則限於職守於勦匪事宜轉恐貽誤自係實在情形袁甲三著毋庸署理安徽布政使卽以三品卿銜兵科給事中勦辦安徽擒匪該員膺茲委任責無旁貸務當督飭地方文武激勵兵勇將潁郡各屬匪徒迅速剪滅以專責成而靖地方○諭袁甲三奏續勦擒匪擒斬首要各犯多名一摺安徽雉河集地方逃回之總擒首鄧大俊復在標里鋪糾眾訂盟經袁甲三分飭文武員弁前往圍拏該匪等膽敢衝突抗拒六品軍功徐曉峯遊擊錢朝舉守備戴世熙等生擒劉禿子等十九名遊擊朱連泰署霍邱縣知縣徐毓寶候補縣丞李萼馨等生擒鄧天兒等十五名並奪獲大礮一尊火槍刀矛多件復追至亳州南境蔣家老

莊將鄧大俊及夥黨于喜一併拏獲其高廬集安豐集義門集等處匪徒均有斬擒各鄉藏匿之賊匪亦經各團練查拏三百餘名人心漸就安定前據呂賢基等奏報集賢關業已收復此股捻匪又經袁甲三督飭文武殲除殆盡本日已有旨令該給事中專辦剿匪事宜著卽將北路先行廓清並將潁屬西南及東路各處捻匪一律掃除毋任蔓延○諭軍機大臣等僧格林沁奏王慶坨等處要隘分兵屯紮並選擇官兵添赴前敵以資協剿一摺布置甚屬周妥本日據勝保奏連日攻剿逆匪堅匿不出見擬分兵先攻靜海等語逆匪分竄獨流靜海築壘空濠負嵎死守勝保擬攻靜海以分賊勢惟獨流係賊眾屯聚之所僅我軍向南攻剿靜海而獨流之賊乘虛竄出亦不可不防見在該大臣駐紮王慶坨應否移營前進兩軍聲息不通何能取勝必須與勝保隨時知照相機

接應總以計出萬全不使賊匪竄逸爲要汝所帶之司員中或議論好無實濟者或心地欠醇者總得刻刻畱心勿得入其計中汝之可以被欺處反因心裏公平無稍曲折朕非教汝不公不平總期公而能明外渾厚而內分明不受人欺卽是可以用人處末世人心未能概以推誠論也將此由六百里加緊諭令知之○諭僧格林沁奏逆匪占踞獨流靜海堅匿不出其勢尙未窮蹙轉瞬河冰凍結頭頭是道設大股賊匪猝突卽當處處攔截得力與否殊無把握等語朕度僧格林沁之意總以及早進攻乘機殄滅勿令他竄爲要該大臣諒亦籌慮及此見在賊匪堅匿木城不出爲死守計必須大兵圍剿方可一鼓蕩平若令僧格林沁帶兵前往助剿不知汝二人共事一方有無牽制之處此舉甚有關繫著該大臣詳慎籌畫一二日內據實覆奏無稍遷就朕斷非疑勝保不能

得力先降是旨以示汝朕專爲全局計設僧格林沁到彼後兩不統轄致多掣肘或分路進攻有無窒礙一併籌之勝保度量甚洪豈至復有避忌知而不盡言乎本日據奏連日攻剿各摺片披覽均悉逆匪分踞獨流靜海往來奔救該大臣擬先攻靜海翦賊羽翼亦出奇制勝之一法惟北面最關緊要且由獨流至靜海更恐有腹背受敵之虞該大臣務須籌畫萬全斷不可顧此失彼致墮奸計逆匪堅守木城礮攻未能得力是否可用土袋累成礮臺自高擊下或於獨流靜海之間橫紮營盤斷賊往來接應之路總宜隨地相機妥籌布置所請京營礮位已諭令巡防王大臣挑選四尊卽日派撥官兵運往備用另片奏十七日出隊火器營官兵遲延未到該大臣僅將翼長玻崇武申飭摘頂未免過寬以後如有似此玩誤不遵調度者卽一面奏聞一面以軍法從事斷勿輕縱

夾紀督隊尙知奮勉著暫存記如該員續有出力之處再由該大臣酌保具奏將此由六百里加緊諭令知之○諭台湧奏撤回官兵防守荆郡一摺前因湖北省城待援甚急諭令台湧督催官兵前進茲該將軍奏稱接准崇綸函稱連日擊獲奸細多名餘匪船隻盡泊漢陽小河口內外大江上下據供由水路直上荊州再到長沙該將軍見已折回等語前據江忠源奏稱賊船見已駛赴下游陽邏一帶地方武昌省城解嚴惟賊情詭詐難保不復圖上竄窺伺荆襄荊州爲楚西重鎮且爲入蜀咽喉自宜豫爲防範台湧著卽將駐防官兵撤回並添調宜昌鎮兵扼守荊州與官文貴陞督率官兵嚴密堵禦如遇賊匪上竄仍須於城外擇要截剿不可株守城內致失事機該將軍見署提督滿漢官兵均歸統轄一切調度必當酌量緩急相機布置儻有疏虞惟該將軍及副都統等

是問並著與吳文鎔崇綸隨時知照互爲聲援將此由六百里加緊諭知台湧並諭官文貴陞知之○山西巡撫恆春奏遵查哈芬前奏程震佑沈巢生各案並藩司糧臺遲緩各情形得旨哈芬所奏各款多無實據著勿庸議惟留程震佑幫辦防堵實屬回護積習以冀事竣保奏徐繼畲係本地紳士著從寬免議郭夢齡著交部議處又奏審擬被賊裹脅人犯包士青請發黑龍江批包士青著解京嚴訊不准遷延如有逃脫等事必將該地方官及押解官照庇縱逆黨以軍法處之又批前有旨令潘鐸赴晉省辦理軍務該員見已降調著飭令來京不准逗遛○以恩錫暫署安徽布政使由刑部員外郎○辛卯賜溫長湧等二十六人武進士及第出身有差○諭軍機大臣等有人奏本年廣西剿辦興安土匪一案臬司許祥光未到之先卽經紳民團練等攻破賊壘收復縣城該

臬司虛冒戰功捏稱勝仗知縣蔡映符陷賊偷生許祥光曲爲解脫並飭令紳士具呈改填復城日期各等弊見在廣西土匪尙未肅清地方官督兵剿賊半資團練之力如果該臬司飾詞冒功並有爲蔡映符掩飾各情該撫不加詳察據以入奏以致物議沸騰亟應從嚴查辦著葉名琛按照所奏情節查明據實具奏毋得稍有回護原摺單六件並蔡映符原示一紙均著鈔給閱看將此由五百里諭令知之○壬辰琦善奏近奉諭旨以皖省告急命飭瞿騰龍帶兵赴援惟三汊河一旅力扼要衝所以能屢敗瓜州賊匪者實賴瞿騰龍之兵爲之援應當此圍城愈急更宜備豫不虞謀報瓜州賊匪又欲糾眾以圖再舉此正須增兵之時非可撤兵之日也夫援皖之與駐揚同一防其北竄然療病者必以標本分後先用兵者必以遠近權緩急無論兵糧久已停支長途資斧無從

措辦且道途遙遠亦恐緩不濟急此閒藩籬自撤適足示弱長驕  
微特揚城與瓜州之賊聯爲一氣克復無期且恐四出蔓延所關  
匪細伏願 聖主鑒 臣血誠並非專顧一隅實欲維持全局准將  
瞿騰龍之兵暫駐揚州協剿一經克復卽行赴皖實於軍務有裨  
上諭朕前以皖省緊急諭令瞿騰龍前往援應今皖省賊情稍  
緩該大臣復以瓜州緊要爲詞所奏尙係實在情形著照所請瞿  
騰龍卽暫畱揚州協剿惟揚鎮諸城久爲賊踞該大臣等頓兵株  
守八月有餘琦善以防賊北竄爲解而賊已擾及畿輔向榮以防  
賊南竄爲解而賊已蔓延江西湖北安徽等處尙稱維持全局不  
知何處始是偏隅見在瞿騰龍旣已准畱若再不迅圖克復更從  
何處添兵何處籌餉著琦善卽督飭將弁迅速進攻萬不准再有  
耽延致干重罪將此由六百里加緊諭令知之○向榮奏 臣接奉

諭旨令派和春等帶兵赴江北協剿揚州自應欽遵辦理惟臣有

鑒於鄧紹良之失除和春而外一時實難另派得力鎮將肩此重

任署將軍蘇布通阿一員老成諳練忠勇足恃原可奉派前往無

如此時大營鎮將除音德布瞿騰龍虎嵩林三員先後帶兵分剿

外馬龍甫經病故德安見又帶兵堵禦東壩其餘鎮將二三員僅

敷調遣遇有緩急足供臂指之使者實屬不可多得惟蘇布通阿

堪以助臣剿賊見在紫營七橋壠在城東南臣紫營紫金山在城

東北相距約十二三里之遙均屬要地每有軍事彼此往來面商

深資勦助設有緊急臣與該署將軍勢不能不分一人駐守一人

帶兵馳救以顧其所急臣思揚城固應先復然以東南大局而論

尤宜急攻金陵惜臣所將兵勇僅存萬人實能出敵打仗者不過

數千若再行分撥卽遇可乘之機亦難操必勝之權臣與彭玉雯

反復籌商擬俟京口瓜州賊壘次第掃除恢復鎮郡再移大兵協  
勦揚城則該逆聞風膽落自可不攻而破臣等已調到洋銅十萬  
斤造成六萬斤銅礮一尊續造三萬斤鐵礮一尊該逆知我礮成  
頗有驚慌之意因一夜趕築礮臺豫備轟擊並密散疑函徧張白  
帖使各逆首互相猜疑又令兵勇數百人用噴筒火罐於黑夜或  
黎明數數燒其營壘該逆甚爲畏懼但使大礮攻打得力臣自當  
督兵晝夜進剿埽穴擒渠上諭軍機大臣等向榮奏金陵兵力  
見難分撥尙係實在情形著照所請和春等卽毋庸前往惟該大  
臣等頓兵日久師老無功大江南北變成坐困之勢雖於疊次所  
奉諭旨捫心抱愧亦復於事何濟見據奏稱造礮築臺豫備轟擊  
並布散疑函焚燒賊壘既有可乘之機著卽趕緊設法圍攻迅圖  
克復毋得再事遷延致干重咎本日據許乃釗奏剿辦上海情形

已諭令該撫相機速辦。如果上海卽日收復，其挖營等船及陸路各軍卽可調回助剿。該大臣所稱收回上海卽調取得勝之師，齊赴京口、瓜州，先復鎮郡，再移兵協剿揚城之處，並著隨時與許乃釗等速籌妥辦。爲要將此由六百里加緊諭令知之。○諭前經疊降諭旨，令許乃釗等迅卽督兵進剿，收復上海。本日據怡良許乃釗奏上海之驟難克復，由於該城東北羅列夷館，恐官兵向北門攻打，城中賊匪回放槍礮，夷館難免受傷，因阻止官兵免攻東北。其洋涇濱等處有夷人把守，該逆米糧火藥難免由此路潛運接濟。等語。上海爲海口通商重地，必須設法不令勾結，方可將城中麇聚匪徒四面兜圍，斷其接應。吳健彰於夷情素所熟習，著怡良許乃釗卽密飭該道曲加曉諭，俾知匪徒及早剿滅於通商事務方有裨益。然後督兵剿辦，方可得手。總在該督撫妥速辦理，不可

遲延時日又致別生枝節另摺奏賊匪於黃浦江中暗雇閩廣商船業經該督撫派員前往解散令其駛出江口並多遣閒諜入城相機離間又飛調水師各戰船並拖罈等船就近先剿上海事竣再赴鎮江所籌尙合機宜著卽照辦另鈔錄接獲逆書二件亦俱覽悉該督撫務卽嚴飭各屬員弁明攻暗訪星夜督兵進剿剋期收復毋再延誤並將通賊奸匪劉麗川設法緝獲毋任漏網將此由六百里加緊諭令知之○江忠源奏臣本擬卽日啟程赴任因親信楚勇及自江西雲南四川帶來官兵俱赴武昌守城是以不能剋期前往再四思維止得與音德布酌帶田家鎮收集之兵一千四百餘名先行赴皖俟賊船全出楚境再飭催各起兵勇隨後趕到正在啟程間接奉諭旨以安慶被賊占踞廬州又在危急令臣帶兵迅赴新任臣卽由黃陂一帶取道六安徑赴廬郡見已差

弁確探安慶廬州賊情應如何辦理之處惟當殫竭血誠統籌全局以期仰副 聖主除暴安良之至意 上諭前因賊踞漢陽武昌危急令江忠源暫留湖北該撫見已由黃陂一帶取道六安徑

赴廬郡見在皖省情形亦甚緊要集賢關雖經收復潁亳土匪疊經袁甲三屢獲勝仗而安慶久被占踞仍恐該逆窺伺廬巢或與皖北捻匪潛相勾結所有防剿事宜該撫抵任後著卽統籌全局與呂賢基袁甲三劉裕鈐等隨時體察情形妥爲辦理本日據吳文錦崇綸奏江忠源原帶兵勇如武昌解嚴卽可酌赴皖省該撫務當先將帶到兵勇迅速布置不可專待楚北撤回兵勇致有延誤至安徽與湖北河南交界地方均須酌度緩急相機防禦如有警急該撫仍當馳往協剿毋誤事機昨福濟奏安徽借撥淮北票鹽道路梗阻未能接濟等語並著江忠源督飭地方設法轉運將

此由六百里加緊諭令知之○吳文鎔崇綸奏查逆賊自攻破田  
家鎮大營卽連檣直上分泊漢陽漢口及省岸之塘角省城兵勇  
不過二千人賊船猝至勢甚危殆九月十八日賊眾紛紛上岸攻  
撲省城之武勝漢陽等門槍礮不絕俱用雲梯爬城臣等督率兵  
勇盡力抵禦拋擲火罐擊斃長髮賊一名擊傷賊匪二名奪獲雲  
梯一架各城兵勇俱奮力堵擊賊氣稍奪始行退去夜間賊復於  
武勝門外江邊築成營牆一片意欲紮營其時城外民房未經折  
盡故賊得以藏身臣等當卽重賞兵丁飭令下城將其營牆折毀  
用火罐燒毀民房賊於空屋中紛竄下船全行開向北岸停泊臣  
等一面催提由江西赴援田家鎮之兵勇陸續到省添布城上守  
垛並於城東門外分撥兵勇擇要紮營以防賊匪鈔襲後路一面  
飛檄江忠源唐樹義將駐防廣濟之兵並收集田家鎮潰散兵勇

馳抵漢口設法攻剿俾漢岸之賊殲除則省城之圍自解江忠源等行抵黃陂因賊已由漢川孝感北擄德安遂提兵赴德安中途探知賊匪未至德安漢川孝感之賊仍竄回漢口江忠源等復帶兵南指此十數日內該匪將漢陽府城內焚毀殆盡又分股駕船於距省上下數十里沿江村鎮及湖汊河港內村鎮肆行搶掠飽載而回以漢口爲巢穴以船隻爲營壘復於夜間明火擊鼓爲渡江撲城之狀臣等憑城目擊因無船無兵不能分撥痛剿不得已

派知府伍煒等帶舊勇兵壯各十餘人覓得小划船數隻藏帶火具黑夜潛渡過江焚其船隻因該逆船隻均閒段灣泊不及延燒前後止焚毀其大小船數十隻並焚其岸上收糧房屋一所又先於九月二十七日股匪駛入黃陂內港欲撲縣城適已革副將張金甲帶兵四百餘名在彼駐防得信後卽率弁兵並激勵鄉民數

百人迎頭截擊擊沈賊船二十五隻焚毀二隻斬首三十餘級生擒二十一名餘匪駛出外江逃歸漢口十月初五日江忠源唐樹義帶兵進紮漢口距漢口不過數十里是夜二更後該匪忽張帆開鎗往下游駛去至初六日黎明所有漢陽城外及漢口河內停泊賊船全數開去江忠源等卽派守備劉富成督兵施放擡礮擊沈賊船數隻餘船駛向中流劉富成率荊州水師兵丁疊水擊翻賊船四隻斃賊匪一百餘人牽獲賊船一隻生擒賊匪十二名是日申刻又有賊船數十隻回竄至漢口下數里地方停泊適伍煜帶勇數百名至漢陽漢口一帶查勘收復事宜趕卽馳赴江干督率壯勇施放檣礮擊斃十數賊該匪等情急開至中流向下游駛去連日差探賊船或一二百隻或數十隻在距省六十里之陽邏以下至黃州一帶靠北岸停泊賊情詭詐難保不乘間回竄我兵

苦無船隻無從追剿而省城防守猶當加倍嚴密臣等一俟雇有

船隻當卽選派將弁追赴下游以剿爲堵遏其回竄之路上諭

據吳文鎔等奏賊船下竄設法追剿各一摺逆匪竄擾漢黃等處

經江忠源等沿江追剿擊獲船隻該逆開帆駛去旋又有賊船數

十隻回竄至漢口下數里停泊見在陽邏以下黃州一帶均有賊

踪來往江忠源業已赴皖唐樹義勢難渡江赴省應援所有漢陽

各處賊匪卽責成該臬司扼要截剿並杜其北竄之路將此由六

百里加緊傳諭知之○予湖北殉節知府金雲門俞舜欽江南陣

亡遊擊李英魁等祭葬世職○癸巳呂賢基劉裕鈐奏臣賢基在

舒城籌辦團練據已革按察使張熙宇稟稱十三日夜大雨如注

安慶賊匪於子時襲冷水鋪德成營盤另一股越過練潭撲入松

安營中各營兵力單薄賊來愈眾兵勇敗退賊匪直竄入桐城南

路意欲乘機入城張熙宇遂由小路退守大關地方等語

臣

正在

分飭各兵勇嚴守大關卽據桐城文生張勳來舒面稟十四日賊匪大股已至附城十餘里經張勳等親赴張熙宇行營請發援兵張熙宇回以未接警信而賊匪四五百人已逼近南門又有一股由東門繞道衝撲各壯勇腹背受敵同時潰散回望桐城城頭已有無數黃旗分門站立縣城失守

臣

等聞信之下曷勝痛恨查集賢關內屋宇被燒兵勇棲止無所是以飭令張熙宇及漢中鎮總兵恆興署副將松安等節節駐守冷水鋪練潭等處防其北竄乃

張熙宇身統各兵經文生張勳等請救並不帶兵護城輒首先退至大關實屬怙怯相應請旨先將張熙宇從重治罪以肅軍令見在賊匪大隊旣踞桐城亟須防其北竄應請旨速飭袁甲三迅帶兵勇前來舒城一帶相機進剿

臣

賢基仍駐舒城號召團練嚴防

賊北竄之路

臣

裕鈐籌撥兵勇設法攻剿以期克復桐城

上諭

內閣張熙宇係屢經獲罪之員朕因其前在閩省剿辦會匪尙有小才是以姑從寬典責令仍在皖省防剿宜如何激發天良戴罪自效乃於賊將至時並不竭力堵禦輒由小路退守迨張勦請救猶敢置之不問以未接警信推託試思該生求救非警信而何似此恇怯畏葸無能之輩止知自顧身家喪膽昧良尙何足惜張熙宇著卽行正法以肅軍令並著呂賢基劉裕鈐等查明總兵恆興副將松安如有退縮逃避等情卽著一面奏聞一面正法新任巡撫江忠源帶兵計日已可抵皖袁甲三見已帶領兵勇馳往協剿著督飭地方文武激勵紳民合力進攻迅掃賊氛毋稍延誤○諭前因江西九江府失守當經降旨將廣饒九南道義泰署九江府事九江府同知顏貽曾兼署九江前後營遊擊浮梁營都司王殿

甲署德化縣知縣戴榮桂革職責令戴罪剿賊茲據奏稱該員等  
於九月二十六日督率紳士兵勇併力攻剿收復郡城請將該員  
等改爲革職畱任等語地方失守城池厥罪甚重如果殲除賊犯  
立時收復功罪尙足相抵自應量予恩施若乘賊匪竄出遂謂收  
復城池該上司輒將獲咎之員奏請畱任是使該地方官視失守  
城池爲無足輕重其何以肅官常而重職守所有張芾奏請將義  
泰顏貽曾王殿甲戴榮桂改爲革職畱任之處著該部查照例案  
覈議具奏○諭軍機大臣等本日據呂賢基劉裕鈐奏賊匪大股  
直撲集賢關外各營兵勇潰敗桐城失守一招覽奏曷勝焦急已  
明降諭旨將張熙宇正法並諭江忠源速赴新任矣袁甲三見在  
潁州剿辦捻匪著卽統帶兵勇馳赴桐城一帶相機剿辦其蒙毫  
捻匪卽著飭令臧紆青帶勇剿捕並著呂賢基劉裕鈐督飭員弁

兵勇扼要截勦以遏賊衝瞿騰龍前經琦善奏畱揚州一時未能  
赴援玉山扼守東關常清駐紮和州是否聲勢聯絡互爲援應著  
該侍郎等酌度情形先其所急力籌防勦江忠源計日可到皖省  
應如何調撥兵勇杜賊北竄之路並酌會商籌辦毋失事機將此  
由六百里加緊各諭令知之○予江西死事照磨黃而烱等祭葬  
世職○甲午諭內閣禮部等衙門議奏 開帝升入中祀禮節一

摺我朝尊崇 開帝祀典攸隆仰荷 神威疊昭顯佑本年復加

崇 封號並升入中祀茲據禮部等衙門詳覈禮節謹擬具奏著  
照所議自明年春祭爲始悉照中祀禮舉行樂用六成舞用八佾  
以昭崇奉而答神庥○諭太僕寺卿王茂蔭奏請旌表殉難士民  
一摺軍興以來被賊滋擾地方文武官紳及兵勇人等或臨陣捐  
軀或遇賊被害經各督撫奏報無不立沛恩施給予卹典並諭令

各省督撫查明被害較烈之員再行分別酌議加贈予諡或令入祀昭忠祠以勵臣節而慰忠魂復念被難各地方士庶人等或因罵賊致戕或因遇侮遭害甚至全家罹難閭室自焚雖貴賤之不同實節義之無愧特恐僻處鄉隅不獲上邀旌卹以致湮沒弗彰朕心惻焉著各該督撫通飭所屬迅速查明遇賊死節士民婦女等除照例題請旌表外其殉難尤烈者並准其奏明請旨分別賜卹該督撫等其秉公詳覈毋濫毋遺以副朕勵節褒忠之至意將此通諭知之○乙未諭內閣宋晉等奏見辦團防情形並遵籌保甲章程開單呈覽一摺五城保甲事宜自應分段派員督辦以專責成著卽派稽察中城御史李宗燾南城給事中彭久餘西城御史章嗣衡北城給事中雷維翰專司其事至東城保甲事宜著添派御史蔣達會同辦理並著翰林院侍講學士銜編修陳介祺編

修鮑源深彭瑞毓戶部郎中易文濬吏部主事憚世臨與李宗燾等會同各段京官紳耆認真經理毋許稍涉紛擾儻有奸匪溷迹卽行嚴拏懲辦另片奏五城添募壯役以資緝捕酌籌捐款以免擾累並清查保甲條約均著照所議辦理仍著宋晉王茂蔭何桂珍會同巡視五城御史並巡防王大臣委令幫辦之李道生馮譽驥梁同新張祥晉黃經周壽昌等一體稽查實力巡緝毋稍疏懈○西安將軍托明阿奏受傷未愈懇請回旗調理允之○予直隸陣亡城守尉德成知州沈如潮祭葬世職建祠○丙申諭內閣御前大臣科爾沁郡王僧格林沁經朕特命爲參贊大臣統領重兵出京扼要駐紮籌辦防剿一切布置均合機宜見值天氣嚴寒念該大臣在軍營中辛勞備至且聞其拊循士卒尤能甘苦與共殊堪嘉尙著發貂冠一頂黑狐骹馬褂一件綠玉煙壺一箇白玉四

喜搬指一箇交僧格林沁祇領以昭恩眷○諭軍機大臣等王懿德奏廈門獲勝並廣東艇船尙須修補開行各摺片廈門逆匪既被圍窮蹙亟應迅速進攻此次進剿以陸路分道圍城以水師嚴扼海口布置尙爲妥協至廣東紅單船前經疊降嚴旨不准再畱據該撫奏稱船多損壞必須修補完固方資駕駛是見在此項船隻仍未由閩前赴江境實屬耽延江南水陸攻剿情形較之閩洋尤關緊要若仍藉詞延宕必致貽誤事機所有遊擊吳全美署都司陳國泰兩起艇船著王懿德懷遵前旨飭令迅卽開行卽小有修理亦著趕緊督辦不准稍緩至孫鼎鼐督帶水師能否得力見當剿匪喫緊之際著該督撫仍須察看該提督施得高如病體稍痊卽飭令趕緊督兵進剿並飭李廷鈺王朝綸等合力進攻迅圖克復毋稍遲誤將此由六百里諭令知之○僧格林沁奏籌辦獨

流賊匪仍駐王慶坨居中策應得旨覽奏俱悉汝此時仍駐王慶坨嚴防甚好本日另有寄諭並明發旨頒汝賞件朕意欲汝激勵將士策應靈捷朕待汝之恩不知欲何等優加豈些微物件所能喻也○予福建仙遊殉節遊擊周兆麟知縣黃曾惠等祭葬世職○丁酉呂賢基奏桐舒交界之處惟大小關最爲要隘然非有兵勇五六十名不足以資守禦見在兵勇寥寥因飭舒城縣知縣鈕福疇招募勇丁一千三百名又咨商撫<sub>臣</sub>劉裕鈺趕緊募勇湊成三千之數卽由大小關前進攻剿若非厚集兵力特派統兵大員克復桐城安慶則賊勢愈張北竄之路處處可虞伏祈飭令江忠源及袁甲三迅速統帶兵勇來舒前進攻剿以期一鼓殲滅上諭軍機大臣等據呂賢基奏桐舒交界之處惟大小關最爲要隘非厚集兵力不足以資守禦等語江忠源於本月十一日由黃陂

一帶徑赴廬郡計日當可抵任見在武昌之楚勇是否可以分撥  
赴皖音德布所帶之兵此時行抵何處務卽飛催前進該撫帶兵  
馳抵該省聲勢庶可少壯前有旨令袁甲三赴桐城一帶會同江  
忠源協剿想能酌度緩急不致有誤事機舒城縣募勇一千餘名  
亦可濟兵力之未逮著呂賢基劉裕鈐認真招募實力團練江忠  
源抵任後卽將皖省全局妥速籌畫督帶兵勇收復桐城集賢關  
則安慶之匪自可次第剿除將此由六百里諭令知之○戊戌諭  
內閣前據國子監司業崇福奏請借徵山西省一年錢糧以濟軍  
餉朕以事關民瘼議屬舛行而軍餉急需又難緩待特命軍機大  
臣大學士會同戶部速議具奏茲據恭親王奕訢等合詞議覆該  
司業所奏度地權時亦係濟急之一策其指陳除弊各條均尙周  
密請照所議責成山西巡撫藩司妥速辦理並推廣陝西四川一

律照辦朕惟軍興三載徵調頻仍各省被賊地方或耕作失時或  
蓋藏罄盡加恩賑貸猶虞民困未蘇何忍於完善之區復有徵求  
之舉第逆匪一日不滅民生一日不安畿輔之賊未除則山陝皆  
難安堵江路之賊不盡則川陝仍事籌防無論風鶴驚疑流離遷  
徙卽商賈不通貲財日耗已足坐困民生朕夙夜焦思不遑寢饋  
惟有叩顙 上蒼速殄逆氛以安黎庶比年內外籌撥軍需不下  
四千餘萬兩內府所積隨請隨發不惜鉅款爲吾民求衽席之安  
中外臣工條陳軍餉凡有不便於民者朕必審慎再三不肯輕爲  
允准誠念我朝二百餘年以來 列祖 列宗深仁厚澤浹洽寰  
區從無科斂病民之舉此次議及借徵事定仍照數蠲免已非朕  
心所安卽王大臣等亦未嘗不仰體朕意慎重諮諏特以除莠安  
良必須寬籌兵餉不能不借資民力以濟要需著照所議所有山

西陝西四川三省咸豐四年錢糧卽行借徵一年於今冬開徵明年春季全數徵完其咸豐五年錢糧卽於明年秋季接徵按年遞推一俟軍務告竣國帑漸裕卽將該三省應徵額賦停徵一年以紓民力而復舊制其山西省被賊各州縣仍著毋庸借徵用昭區別各該省地方紳士商民比歲捐貲備餉爲數較多忠義之忱朕所嘉許今就正供賦額提趨半年取之民者還以衛民凡我編氓同仇敵愾具有天良自無不輸將踴躍以助軍需至借徵之議原爲軍餉而設除弊之法尤須格外從嚴向來不肖官吏暴斂橫徵虐民病國弊端百出久爲朕所洞知此次各該州縣及該管上司儻敢狃於積習縱容胥役多取絲毫一經科道糾參或被部民告發審實後卽以軍法從事如各該督撫委任非人以致別釀事端除將本員正法外督撫藩司一併拏問治罪此係朕爲民除害萬

不得已之苦心天下臣民諒能其喻也此旨著該督撫刊刻謄黃  
徧行曉諭務使窮鄉僻壤咸知朕意○諭桂良奏請將玩視調遣  
之署藩司交部議處一摺署直隸藩司張集馨經欽差大臣勝保  
札調防堵後並不趕緊稟報以致該督復行飭調來省當此軍務  
喫緊之際豈容似此玩延致誤事機張集馨著交部嚴加議處以  
示懲儆○諭軍機大臣等勝保奏連日攻剿獨流逆匪獲勝情形  
一摺本月二十四五兩日勝保督率各路兵勇用大礮火箭轟燒  
賊壘約斃逆匪數百餘名惟所調京營礮位尙未趕到當此圍攻  
喫緊之際必須厚集兵力速破賊巢著僧格林沁卽於德勒克色  
楞伊勒東阿二人中揀派一員酌帶精兵前赴勝保軍營協剿務  
將獨流逆匪迅速殄滅俾軍務早竣以慰廑念將此由六百里加  
緊諭令知之○諭前因福建會匪滋事疊經諭令黃宗漢迅調官

兵相機赴援本日據有鳳奏閩省兵力單弱請飭調浙江精兵來  
閩協剿等語閩省賊匪糾黨分擾膽敢圍撲興化郡城經該督飛  
調各兵馳往會剿其上游賊匪疊經剿洗仍應嚴密防守兵力實  
行單薄浙省齒相依撥兵進剿較爲便捷見在江西逆匪竄散  
浙省防兵當可就近赴援著該撫卽於衢州金華嚴州鎮協各屬  
挑選精兵各五百名配帶軍裝器械遴委得力將弁星速管帶赴  
閩以資協剿並著該署督迅速催調以期早淨賊氛毋致蔓延將  
此由六百里各諭令知之○以帶兵遲緩革陝西陝安鎮總兵官  
郝光甲職仍畱營效力○革職畱任湖北巡撫崇綸奏報謝恩並  
稱已革同知勞光泰所帶廣勇通賊以致兵勇潰敗得旨廣勇固  
不可靠然亦可駕馭驅使勞光泰若從此無下落朕斷不輕恕朕  
間張亮基欲用勞光泰謂其才尙堪用汝則曰雖有才怕靠不住

既中無定見何不力阻在張亮基原非意料所及汝之依違兩可  
大負委任朕又聞勞光泰依附最多音信最快汝二人若不認真  
嚴緝止知遠避誹謗不獨深負朕恩亦無以對忠藎幽魂昭昭在  
上自有監臨悠悠之口何足畏也前次諭旨朕已定該革員極刑  
往復思之實不爲過惟看吳文鎔所辦何如耳此旨與吳文鎔同  
看該督老成練達必能補汝之不足懍之○辛丑諭內閣前因桂  
良奏參署直隸藩司張集馨不遵調遣當經降旨交部嚴加議處  
茲復據桂良奏參張集馨擅將要隘官兵調赴他處並片奏該司  
經勝保札調既不遵令赴防又不稟報該督迫勝保飛咨催調該  
督屢飭折回仍復抗違進省並稱該司自辦軍興以來所費錢糧  
庫款甚鉅半載以來並未聞其接仗獲犯遷延觀望虛糜帑金竟  
置官兵於無用之地等語張集馨係棄瑕錄用之員不知感奮圖

報帶領多兵耗費軍楫屢違調遣見當防勦喫緊之際豈容此等  
劣員玩延貽誤張集馨著革職發往新疆效力贖罪不准逗遛○  
以楊需爲直隸布政使

由長蘆鹽運使遷

○予湖南安仁殉節訓導吳棠

祭葬世職○是月賑直隸保定等四縣被水災民蠲緩安州等五  
十三州縣水災風災廣西新甯等二十一州縣被擾地方新舊額  
賦緩徵奉天牛莊各旗界水災新舊額賦